

(16)

DISSERTATIO PHILOLOGICA INAUGVRALIS,
PARTEM ALTERAM SISTENS
ANTIQVITATVM
OECONOMIAE
PATRIARCHALIS,

VIDELICET
COMMENTATIONEM
DE
PATRIARCHARVM FAMILIA, HABITACVLIS, VICTV ET AMICTV:

QVAM
PRAESIDE
CHRISTIAN. BENED. MICHAELIS,
PHILOS. P. P. ORDIN. ET h. t. DECANO,
PRO CONSEQVENDIS SVMMIS IN PHILOSOPHIA
HONORIBVS AC PRIVILEGIIS,

A. CIO MDCC XXIX. D. XV. IVL.

PVBICO EXAMINI SVBICIET

IOANN. DANIEL TAPKEN,
REGIOMONTE BORVSSVS.

HALAE MAGDEBVRGICAE
TYPIS CHRISTIANI HENCKELII, ACAD. TYP.

28

VIRO
SVMMÆ REVERENDO ATQVE DOCTISSIMO,
DOMINO
IOANNI IACOBO
RAMBACHIO,

SACRO SANCTAE THEOLOGIAE PROFESSORI
IN FRIDERICIANA REGIA PVBLICO
ORDINARIO,

DE ECCLESIA ET REPVBICA LITTE-
RARIA MERITISSIMO,

PATRONO SVO AC PRAECEPTORI PIA DEVOTAQVE
MENTE COLENDO,

EA QVA PAR EST OBSERVANTIA,
DISSERTATIONEM HANC

IN SVMMÆ ET PERPETVÆ OBSERVANTIAE
TESTIFICATIONEM CONSECRAT

IOANNES DANIEL TAPKEN.



58700 (16)

VIR

SVMME REVERENDE AT-
QVE DOCTISSIME,



EA TVA est pietas, VIR OPTIME
ET SVMME REVERENDE! vt,
cum omnia ad SVMMINIMINIS
laudem & gloriam referas, malis de eccle-
sia, & iis, qui TIBI se commendant, præ-
clare mereri, & recte humaniterque factorum conscien-
tia frui, quam ab vilo, multo minus a me laudari & præ-
dicari. Ego vero de iis, quæ me potissimum spectant & or-
nant, possem plurima eaque maxima commemorare, qua
fronte benigna me ad Academiam accedentem exceperis,
quanto fructu lectionibus publicis priuatisque auxeris,
quam denique fidelissimis consiliis confugientem ad TE
tum ad sinceram pietatem exhortatus sis, tum ad augmenta
optimarum litterarum capienda informaueris. Sed hæc
omnia

omnia, quæ laudum TVARVM amplissima mihi essent materia, iam cogor omittere, cum & digne a me ne recenferi quidem possint, & id etiam TVA modestia prohibeat. Quamobrem, quæcunque iam dudum fama de TE celeberrima, in animo meo excitauerat, & quæ dein confirmavit, & mirifice adauxit eximia TVA in me humanitas, hæc omnia maximæ in TE obseruantia & flagrantissimæ pietatis vocabulo comprehendam. Hanc vero licet in priuatis colloquiis, quorum copiam perbenigne mihi facere soles, declarare sæpius conatus fuerim, voluit tamen publica quadam significatione, nempe Dissertatione, quæ Venerando TVO NOMINI inscripta apparet, prodere omnibus & explicare. Ex hac igitur, si animum meum, & voluntatem ad TE obseruandum & colendum propensissimam, agnoscere benigne volueris, tantis TVIS in me meritis adiicies cumulum, & me in laudandarum actionum via ad TVA & ceterorum Academiae nostræ Venerandorum Patrum vestigia obseruanda & sectanda eo vehementius exacues. Vale, VIR SVMME REVERENDE, Ecclesiae & litterarum rem diutissime felicissimeque ex omnium bonorum voto exorna, & me constanti TVO fauore complectere. Halæ die xiii Iulii MDCCCXXIX.



Q. D. B. V.

§. I.



Emestree effluxit, ex quo

de antiquitatibus œconomix patriarchalis philologicam dissertationem publico examini subiecimus. Ac initio quidem tractationis illius nostræ constitueramus, totum argumentum vna tantum disputatione constringere :

Ratio instituta de antiquitatibus œconomix patriarchalis tractatio.

cum vero labor sub manibus præter opinionem nobis creuisset, filum abrumpere, & quod materiæ illius reliquum erat, in aliud reservare tempus visum est; ne prolixiore scriptione dissertationis academicæ limites excederemus. Quamobrem, cum pro summis in philosophia honoribus, ex superiorum voluntate capeßendis, specimen inaugurale proponendum sit, commodam nobis nacti esse videmur occasionem, argumentum illud, quod superiori disputatione imperfectum reliqueramus, resumendi, continuandi, & absoluendi. Id ergo agemus in præsentì, ut, ad complendam patriarchalis œconomix ideam, quam animo nostro complexi eramus, lectores cupidi de patriarcharum *servis servabusque, habitaculis item, & victu* atque *amictu*, quantum satis est, instruantur. Nec vero de singulis hisce momentis alia temere dicemus, quam quæ

A

ad

ad illustrandam diuinam Mosis Genesin, & ad patriarchalis imprimis historiae intelligentiam, videbuntur pertinere. Faxit Deus, feliciter, & ad legentium ædificationem!

Familia operariorum diversa, mercenaria & serua vilis.

§. II. Ampla fuit patriarcharum œconomia: quod superiori dissertatione §. XXIII. cum in designandis illorum opibus occuparemur, ostendimus. Adeam igitur curandam & administrandam, opus habuerunt operariorum vtriusque sexus numero haud exiguo. Et vero hi, qui dominis in curanda re familiari, præter ipsorum liberos, adiumento sunt, duplicis esse generis reperiuntur: primo *mercenarii*, deinde *mancipia*. Ac *mercenarii* quidem, Hebræis nomine שכירים *conductorum* venientes, sunt qui pro mercede, quam pacti sunt, heris incertum tantummodo tempus suas addixerunt operas: at *mancipia* homines sunt dominis proprii, iique perpetuæ seruituti mancipati, Hebræis dicti עבדים ושפחות *serui & seruæ*, vel, quod perinde est, אמהות *ancillæ*. Cave enim, vbi in sacro codice *seruorum seruarumque* mentio fit, talem intelligas operariorum familiam, qualem hodie in plerisque Germaniæ locis, vbi seruitus abrogata est, vernaculo sermone *Knechte und Magde* adpellare solemus, hoc est, liberam, & quæ pro definita mercede herilibus seruitiis in certos siue dies, siue menses, siue annos, adstricta sit: potius *mancipia* sunt, eaque vel adquisita bello, vel pretio emta, vel dono accepta, vel hereditate relicta, vel denique (*vernas* adpellare Latini solent) domi ex ancillis nata. De *mercenariis* hæc inter alia loquuntur Pentateuchi loca: Leu. XIX, 13. *Ne pernoctare sinas mercedem operis (שכיר) MERCENARIII apud te usque mane:* & Deut. XXIV, 14. 15. *Ne vim inferas MERCENARIO; - - die suo mercedem ipsius dato, nec super ea sol occidito, cetera.* Et ab his *mercenariis* satis dilucide *mancipia* distinguit Moses, dum Leu. XXV, 39. seqq. nomine ipsius Dei loquens, populo Israelitico, quodsi, inquit, ad paupertatem redactus fuerit apud te frater tuus, & tibi vendiderit sese; non uteris eo ut seruo: ut MERCENARIUS, & ut inquilinus erit apud!

apud te. - - Quoniam serui mei sunt, quos eduxi e regione Aegypti: non vendentur venditione MANCIPII. Agentibus vero, quæ circum vos sunt, ab illis, inquam, emetis SERVVM ATQVE ANCILLAM, cetera.

§. III. Non quidem est vero absimile, patriarchali ævo Patriarchæ mercenariis quidem aliquando, potissimum vero servis in œconomiis suis vsi. mercenarias hominum liberorum operas in familiaris rei administratione subsidio fuisse: inprimis vbi œconomia fixo adstricta fuit loco; non vero migratoria, & tralatitia, vt Abrahami, Isaaci, Iacobi. Sic enim Iacobus ipse auunculo suo ac postmodum focero Labano, annos bis septem pro vxoribus suis, Lea & Rahela, mercenarii loco seruiuit, Gen. XXIX, 18. seqq. Eteadem fuit procul dubio conditio Mosis, cum ducta Iethronis filia, foceri pecus, non suum ipsius, in Midianitide ac vicinis desertis paut, Exod. II, 21. & c. III, 1. Sed & Iobi tempore, qui a patriarcharum ætate quam proxime abfuit, fixasque habuit in Ausitide regione sedes, præter seruos seruasque, conductitios quoque operarios in vsu fuisse, ex Iob. VII, 1. 2. & c. XIV, 6. vbi tum seruos tum mercenarios commemorat, haud temere colligimus. Fatendum est tamen, eos patriarchas, de quibus nos maxime agimus, hoc est, Abrahamum, Isaacum, Iacobum, & quorum in Genesi fit mentio, mancipiis potissimum in œconomiis suis vsos esse. Etenim, cum sit in historiis illorum altum de *mercenariis* silentium, celebris contra *seruorum seruarumque* mentio est: v. g. in rebus Abrahami Gen. XII, 16. c. XXIV, 35. Isaaci Gen. XXVI, 14. & Iacob. XXX, 43.

§. IV. Habuit autem patriarchalis œconomia in seruo Familia seruorum & seruorum adparatu multum præ mercenariis operis vilis patriarchali œconomia admodum commodatior, quam mercenaria. rum & seruorum adparatu multum præ mercenariis operis commodi. Id quod rationibus, tum communibus, tum singularibus, demonstrari potest. Etenim quod ad illas, negari nequit, seruorum familiam dominis suis multo magis, quam conductitios operarios, ad obsequium esse obstrictam, multoque magis pendere ab illorum imperio & nutu, paratam omni tempore iussa facere, nec fastidiosam laborum, siue viliorum,

rum, siue duriorum. Et meminimus, *Wilhelmum* Baronem a *Schræder* in *Oeconomico* suo, cui titulum fecit *Fürstliche Schatz-und Rent-Kammer*, quæstionem, num ad promouendam agriculturam, & rem omnem ruralem, expediat, seruitutem apud Germanos in usum reuocare? adfirmavisse; hac tamen sub conditione, si adhibeantur barbari, ex. gr. Mauri Africani; utpote qui ad seruitutem videantur nati, & liberos suos ad seruitutem ipsi vendere haud dubitent. Sic enim existimat, omnia parabiliore pretio constituta esse, cum quod merces nulla mancipiis sit danda, tum quod serui viliori victu alantur, & tolerandis durioribus laboribus adsueti sint. Nos quidem quæstionem hanc aliis lubenter decidendam relinquimus, qui, sicut libertatem tanquam diuinum donum ipsi æstimamus, ita aliis, vel studiose retinentibus, vel legitime quærentibus, haud inuidemus. Sufficit nobis, ad latis tum rationibus, tum auctoritate viri œconomicarum rerum peritissimi, ostendisse, commodas omnino dominis esse seruitutes. Quod vero in præsentī singulariter attendendum est, patriarchalis œconomia migratoria fuit, & cum patriarchis ipsis heic illie incertis sedibus oberravit; ex *Vra Chaldæorum* in *Carras Mesopotamiæ*, hinc in *Cananæam*, atque ex *Cananæa* in *Aegyptum* delata, in *Cananæa* ipsa denique non vni adfixa loco, sed instabilis ac multiuaga: quo quidem statu rerum facile est reputatu, quam difficile patriarchis futurum fuisset, ubiuis locorum mercenarios reperire tum fideles & commodos, tum sufficienti numero; sicuti contra serui, quocunque tenderent heri sui, eis indiuiso nexu coniuncti manserunt, secundum illud *Iureconsultorum*, *Accessorium sequitur suum principale*.

Seruitutis origines atque causæ: tum ante, tum post diluvium.

§. V. Hoc loco, ubi iam patriarcharum ætati familias seruatorum adserimus, non inutile fuerit, aliquam enodare quæstionem, nempe quæ fuerint seruitutis origines atque causæ? Prima & antiquissima eius mentio occurrit *Gen. IX, 25*. ubi *Noachus*, ex crapula sua expergefactus, cum rescivisset, quid sibi filiorum natu minimus fecisset, *Maledictus sit*, inquit, *Canaan*:

naan : SERVVS SERVORVM *fiat fratribus suis* ! Quamvis autem tum, cum Noachus hæc proloqueretur, hoc est, temporibus a diluvio proximis, nullæ videantur fuisse servitutes, sed communis originis memores vna omnes habitauerint, liberi, & æquali conditione gaudentes; tamen, nisi servitus iam ante diluvium inuenta fuisset, vix credibile est, Noachum eius, tanquam suo ævo adhuc incognitæ, mentionem facturum fuisse: quia rerum nondum existentium sicut ideæ, ita vocabula nos deficiunt. Non puto igitur falleremur, si originem servitutis ante diluvium quæsiuerimus; cum *Nephilæi*, hoc est, homines bellicosi & fortes, iique rerum gestarum fama celebratissimi, ab inuasionibus & irruptionibus hostilibus nomen hoc consecuti, iam tum in terra exstiterint, Gen. VI, 4. & ab illis *terra vi iniusta oppleta fuerit* v. II. 13. Nec enim ab iniusta vi alienum est, alios, quos bello deuiceris, in servitutem redigere: siquidem (vt paulo post cognoscemus) nomen ipsum *seruorum* inde natum est, quod captiui, seu bello capti, solerent vendi, & per hoc *seruari*, ne occiderentur. Eadem autem vis, quæ iam ante diluvium grassata erat, post illud re-crudit, cum hominum genus in varias diuidi colonias cœpisset: videlicet tempore Nimrod, de quo dicitur Gen. X, 8. 9. *Is cœpit esse potens in terra: is fuit potens venatione coram Domino.* Id enim de oppressione & captiuatione aliorum diu- dum intelligi, sequentes docent versus 10. & 11. in quibus regni ab eo adquisiti tum initium tum progressus exponitur: nempe venationibus ferarum ambitiosus homo gradum sibi fecit ad venandos homines; sicuti Christus (quanquam bono sensu) discipulos suos ex piscatoribus piscium *hominum pisca- tores* fecit Matth. IV, 19. Hæc prima forte fuerit servitutis causa atque origo: quam alia postmodum excepisse videtur, videlicet paupertas; cum (vt IO. CLERICVS Comm. ad Gen. IX, 25. obseruat) multi, qui vnde viuerent non habebant, nec comparare sibi aliunde, quam aliis seruiendo, poterant, libertatem suam victus causa addixerunt. Inde quoque nati *vernæ*,
A 3. serui.

seruili conditioni, ipsa nascendi forte, mancipati sunt. Vere igitur IUSTINIANVS lib. I. Instit. tit. III. de iure personarum: *Seruitus est constitutio iuris gentium, qua quis dominio alieno contra naturam subiicitur. Serui autem ex eo adpellati sunt, quod imperatores captiuos vendere, ac per hoc seruare, nec occidere solent. Qui etiam mancipia dicti sunt, eo quod ab hostibus manu capiuntur. Serui autem aut nascuntur, aut fiunt; nascuntur ex ancillis nostris; fiunt aut iure gentium, id est, ex captiuitate, aut iure ciuili, cum liber homo maior viginti annis ad pretium participandum sese venundari passus est.*

Abrahami &
Loti Chara-
nenfes serui
Gen. XII, 5.
qui locus ex-
plicatur.

§. VI. Vt ad patriarchales seruos reuertamur, illorum numerum, pretio paratum suo, Abrahamus Lotusque Charane, seu Carris Mesopotamiæ, vna cum reliquo peculio suo, secum in Cananæam duxerunt. Id quod recte videmur colligere ex his verbis Gen. XII, 5. *Sumpsit Abramus Sarain uxorem suam, & Lotum, suum ex fratre nepotem, omnesque facultates suas, quas adquisiuerant, וְאֵת הַנֶּפֶשׁ אֲשֶׁר עָשׂוּ בַּחַרְן* ET ANIMAS, QUAS FECERANT CHARANE, exiueruntque, vt in Cananæam proficiscerentur. Nec enim heic adsentimur illis interpretibus, qui (vt IO. CLERICVS Comm. ad l. c. bene iudicauit) subtiliores æquo, & auctoritate Scripturæ & grammaticæ destituti, verba ista de his, quos religionem veri Dei docuerint Abramus & Lotus, explicant. Ex horum numero paraphrastes Chaldæus ONKELOSVS verba modo memorata sic reddidit: *& animas, quas legi seruire fecerant Charane.* IONATHAN vero, ac interpres Chaldæus HIEROSOLYMITANVS: *& animas, quas profelytos fecerant Charane.* Quomodo & SAL. ISAACIDES Comm. ad l. c. *Animas, inquit, quas collegerunt sub alas Schechinæ, seu Numinis; Abrahamo viros, Sarai vero mulieres faciente profelytos.* Recte tamen subiungit: *Secundum litteralem Scripturæ sensum verba illa de seruis atque seruabus Charane acquisitis intelligenda sunt.* ANIMA enim, vt generatim personam, sic speciatim mancipium Hebræis per synecdochen designat: vt quum Ezech. XXVII, 13. Iones, Tibareni ac Moschi commercia dicun-

cuntur exercuisse cum Tyriis בנפש אדם *in animabus hominum*, hoc est, mancipiis; & quum ad imitationem huius loci & locutionis, Ioannes Apoc. XVIII, 13. in mysticæ quoque Babylonis mercibus ψυχὰς ἀνθρώπων, *animas hominum*, eodem significatu, commemorat. Nec latinis auribus phrasin hanc prorsus insuetam esse, ille TACITI locus lib. IV. Hist. c. 32. credibile nobis facit: *Vos autem Treueri & cetera seruientium animæ.* Verbum vero פועל FACERE, quo Moses utebatur, idem aliquando est, ac *parare, comparare, adquirere*: vt cum Gen. XXXI, 1. *De eo, quod patris nostri est, inquit filii Labani, fecit*, id est, parauit Iacobus omnes opes has; & cum Ezech. XXXVIII, 12. *faciens* dicitur pro *adquirente pecus atque peculium*. Quomodo & Latinis apud TERENCEM dicitur, *tuerem nunquam facies*, pro, *adquires*; & apud NEPOTEM in Cimone, *qui magnas pecunias ex metallis fecerat*, pro, *compa-
rauerat, redegerat*. Vt adeo *animæ, quas fecerant Charane*, nihil sint aliud, quam mancipia pretio ab Abrahamo & Loto illic emta. Et mancipiorum quidem copiam præbuit Syria omnis, tum cis Euphratem, tum Mesopotamia, in qua Charan sita fuit: vnde apud Romanos *Syri seruituti* credebantur *nati* esse, quemadmodum pluribus ostendit IO. CLERICVS Comment. in Genes. XXXII, 5. Ex iisdem vero Charanensibus Abrahami seruis etiam fidus ille & hero suo tantopere deamatus *Eliezer* fuisse videtur. Etenim vocatur is Mosi קרן ביתו *senior domus Abrahami* Gen. XXIV, 2. vnde colligimus, eum ex primis Abrahami seruis fuisse: deinde, vti Charanense oppidum in Aramæa seu Syria intra Euphratem situm, sic & Eliezer ex Damasco, vrbe nobilissima Syriæ, quanquam extra Euphratem, oriundus fuit, Gen. XV, 2.

§. VII. Porro hunc Charanensium mancipiorum numerum Abrahamus maiorem in modum auxit, tum in Aegypto, quo propter famem Cananææ grauem concessit aliquando, tum in Cananæa ipsa. Prius adsertionis nostræ membrum liquet ex Gen. XII, 16. vbi, *Abrahamo benefactum est*, inquit
Patriarcharum serui
vel donatio
tū, vel emtio
tū, vel veritas
næ, vel hæreditarii.
Moses, *re-*

Moses, propter Saram; & obtigerunt ei pecudes atque armentum, & asini, SERVI ITEM ET ANCILLAE, asinae & cameli. Nec est improbabile, ex his mancipiis Aegyptiacis, a Pharaone donatis, *Hagaram Aegyptiam*, ancillam Saræ, fuisse c. XVI, 1. Posterius vero membrum patet pariter, cum ex Gen. XX, 14. vbi Philistæorum rex Abimeleclus pecudibus, armento, *seruisque & ancillis* Abrahamum donasse legitur; tum ex c. XIV, 14. vbi iam isto tempore, quo Cedorlaomerus, iunctis sibi foederatis regibus, irruptionem in Cananæam fecerat, ad persequendum eos Abrahamus eduxit אֲרָם חֲנִיכָיו יְלִידֵי בֵיתוֹ *instructos*, seu *initiatos suos*, *natos domi suæ*, id est, vernas, & per synecdochen seruos, numero *trecentos atque octodecim*. Pertinet huc quoque, quod Gen. XXVI, 14. de Isaaco dicitur, *fuisse ei עֲבָרָה רַבָּה* *seruitium multum*, seu, vt Latinus interpres vertit, *familia plurimum*, posito abstracto loco concreti; inprimis si conferantur v. 19. 25. 32. vbi *seruorum Isaaci* iterata mentio; prout superiore Dissertatione §. VII. ostendimus. Item quod de Iacobo in Mesopotamiis agente legimus Gen. XXX, 43. *Habuit pecudes multas, & ancillas seruosque*: & quod Iacobus ipse Esauo fratri nunciari iubet c. XXXII, 6. *Obtigerunt mihi boues & asini, pecudes, seruique & ancillæ*. Quodsi haec summa subducatur, Patriarchæ quidem mancipia sua triplici potissimum possederunt titulo: primo *donationis*, v. g. Abrahamus partem aliquam familiae suæ ex liberalitate Pharaonis & Abimelechi, vxoresque Iacobi ancillas suas Zilpam Bilhamque, vtpote quas Laban filiabus suis, Iacobo locatis, occasione nuptiarum dedit c. XXIX, 24. 29. deinde *emtionis*, v. g. Abrahamus atque Iacobus Charanenses suos, seu Mesopotamios; ac denique *natiuitatis*, quos ex ancillis natos habuerunt. Hos adpellaueris יְלִידֵי בֵיתוֹ οἰκονογενῆς, *natos domi*, illos מִקְנֵת כֶּסֶף *emtionem argenti*, hoc est, *emtitios*, ex Gen. XVII, 12. 13. istos נֶתְחִינִים seu נֶתְחִינִיִּם *Nethinæos*, id est, *donatitios*, seu *dono datos*, ex Ezr. VIII, 17. 20. Addimus tamen & *hereditatis* titulum: quia Gen. XXIV, 65. atriensis Abra-

Abrahami, cum ex Mesopotamia redux Isaacum in agro obui-
um sibi haberet, sciscitanti Rebeccæ, quisnam sit vir ille, respon-
det: **הוּא אֲדֹנָי** *Is est dominus meus*; coll. v. 36. & c. XXV, 5.

§. VIII. In his patriarcharum seruis vnus præcipue e-
minuit, quem siue cum Latinis *atriensem* vel *villicum*, siue cum
Græcis *ἐπίτροπον* vel *οἰκονόμον* adpellauerimus, non errabimus,
puto. *Atrienses* quidem serui Romanis proprie dicti, quod
atrium tuerentur; iidem vero præ ceteris seruis in magno fu-
erunt honore, & in familia tota plurimum potuerunt: vti plu-
ribus ostendit LAVR. PIGNORIVS de seruis p. 227. seqq. *Vil-*
lici item adpellati sunt, tum villæ rusticæ præpositi, tum qui
urbanæ familiæ loco dominorum præessent; aliis quoque no-
minibus dicti *monitores*, *dispensatores*, & *procuratores*: vti
idem PIGNORIVS p. 267. nos docuit. Porro in Glossario
veteri *villicus* Græce exponitur *οἰκονόμος* *dispensator*, (puta, vr-
banus,) & *ὁ κατ' ἀγρὸν οἰκονομῶν* *villæ rusticæ præfectus*. Et deni-
que *ἐπίτροπος*, quem vocant Græci, dignitate & auctoritate
a reliqua seruorum turba distinctus fuit: vnde ARISTOTELES
Oeconom. lib. I. c. 5. *δῶλον εἶδη δύο, ἐπίτροπος, καὶ ἐργάτης*, *seruo-*
rum genera duo sunt, procurator siue villicus, & operarius;
nempe ille mandat, ac dirigit operas, hic vero illius imperata
facit.

§. IX. Talis igitur atriensis, vel villicus, fuit in Abraha-
mi familia *Eliezer*, isque tanta apud herum suum gratia va-
lens, vthic, si *ἀτεν* moriturus fuisset, eum bonorum suo-
rum hæredem instituere decreuisset, Gen. XV, 2. 3. 4. dignus
proinde, de quo nonnulla adhuc moneamus. Primo enim is l. c. *Damas-*
cenus sit adpellatus, idemque
nominatur **דַּמָּשְׁקִי אֱלִיעֶזֶר**, quasi *Damascus Eliezer*; sed du-
bium vix est, quin **דַּמָּשְׁקִי** *Damascus* positum sit pro **דַּמָּשְׁקִי**
Damascenus, vel, quod eodem recidit, **בֶּן דַּמָּשְׁקִי** *e Damasco* o-
riundus; plane vt 2 Sam. XXIII, 24. Elchanan filius Dodonis
vocatur **בֶּן לֶחֶם** *Bethlehemum*, pro **בֵּית לֶחֶם** *Beth-*
lehemita, vel **מִבֵּית לֶחֶם** *e Bethlethemo*, quod exstat in par-
allelo 1 Par. XI, 26. Interim patronymicum illud, *Damasce-*
nus,

In Patriarcharum ser-
vis eminuit
atriensis seu
villicus.

Atriensis A-
brahami Elie-
zer, qua ra-
tione Damas-
cenus seu Da-
mascenus sit
adpellatus,
idemque
οἰκέτης,
filius discurs-
sationis do-
mus, & seni-
or domus,
Gen. XV, 2. 3.
4.

mus, non solum cum proprio ipsius nomine *Eliezer* coniungitur, sed & præponitur ei; perinde ac si & ipsum nominis personalis indolem induisset, cui sequens illud *Eliezer* tantummodo synonymiæ causa adiectum esset. Forte eius rei rationem dare potuerimus ex VARRONE lib. VII. de L. L. ubi a regionibus vrbibusue nomina seruis imposita esse docet: *Sic tres cum emerunt Ephesi singulos seruos, nonnunquam alius declinat nomen ab eo qui vendit Artemidorus, atque Arteman appellat: alius aut ab regione, quod ibi emit, ab Ionia Ionem: aut ab vrbe Epheso Ephesium.* Vide PIGNORIVM de seruis p. 39. Deinde adpellatur is quidem v. 3. בן בית *filius domus meæ*, hoc est, οἰκῆτης, domesticus, familiaris, seruus meus; qui titulus ipsi cum reliquis heri sui seruis communis fuit; at eidem mox v. 2. audit בן משק בית *filius discursationis domus meæ*; quod nomen eum a conseruis ipsius distinguit. Dictus autem ita est a שקק *discursando*, seu *obeundo*, quod, sicut ipsum patrem familias, ita oeconomum, seu atriensem seruum, deceat, omnes administrationis suæ partes, & omni tempore, frequenter circumire, quo omnia contempletur, nec ignoret, quidquid recte fieri possit ac debeat. Vocatur is porro זקן בית אברהם *senior domus Abrahami*, qui dominabatur omnibus quæ erant ei, Gen. XXIV, 2. Quod de ætate Eliezeris heic legitur, id stationi ac muneri eius apprime convenit. Nec enim decebat eum, qui familiæ dominicæ episcopus erat, imberbem esse ac iuuenem. Rationem doceat COLUMELLA, qui lib. I. de re rust. c. 8. præcipit: *ut is, qui villicus instituendus est, iam transcendenter ætatem primæ iuventutis, ne auctoritatem detrahat ei Dominus ad imperium, cum maiores dedignentur parere adolescentulo.* Optandumque foret, ut huic regulæ œconomicae, quam decorum & prudentia firmant, ubique, etiam in principum aulis curiisque, & in ipsa ecclesia, quæ domus Dei est, locus quantum pote daretur. Quæ autem COLUMELLA ibid. paulo post in villico suo requirit, *nec tantum, inquit, operis agrestis sit artifex, sed & a-*
nimus

nimi, quantum seruile patitur ingenium, virtutibus instructus; ea Eliezer non solum adæquasse, sed penitus superasse censendus est, si quidem virtus pietasque eius, Gen. XXIV. luculenter descripta, reputetur. Adeo, ut vel hinc œconomica Abrahami prudentia dilucidior fiat, quod tam dignum familiæ suæ præfecerit rectorem ac villicum.

§. X. Quod Eliezer in domo Abrahami, idem posthac Iosephus, Iacobi filius, in domo & familia Potipharis Aegyptii fuit. Hic enim, ut auctor est Moses Gen. XXXIX, 4. *præfecit Iosephum*, a Midianitis sibi venditum, domui suæ, (Paraphrastæ Chaldæi *Jonathan & Hierosolymit.* verterunt id **וּמְנִיָּה** : **בֵּיתָאֵלְיָזָר** *constituit eum ἐπίτροπον super domum suam*;) omniaque sua in potestate eius posuit. Plane ut Eliezerem dixerat *dominatum fuisse omnibus quæ erant Abrahamo* c. c. XLIII, 16. XXIV, 2. videlicet non propria quidem, attamen ab hero suo accepta potestate: quia villicus in locum domini successit, indeque vicedomini nomen nactus est aliquando, tradente PIGNORIO p. 267. Et talem ἐπίτροπον, seu procuratorem, vicissim habuit Iosephus, cum ad summos a Pharaone honores euectus fuisset. Vocatur is enim Gen. XLIII, 16. 19. & c. XLIV, 1. 4. **וְהָאִישׁ אֲשֶׁר עָלָיו בֵּית יוֹסֵף** *Vir ille, qui præerat domui Iosephi.* Qui quanto in honoris ac dignitatis gradu fuerit, vel ex hoc liquet, quod fratres Iosephi c. XLIV, 9. & nos quoque, inquit ei, *erimus domino meo serui*; & quod ipse, conditionem ex parte accipiens, v. 10. ait: *apud quem repertus fuerit scyphus, is mihi seruus erit.* Ad quem locum Io. Clericus in Comm. hæc quidem adnotauit: *Quando dicit, IS MIHI SERVVS, heri nomine loqui videtur; neque enim atriensis hoc sibi iuris tribuisse, ut ipse seruos haberet, qui heri furati essent utensilia, verisimile est. Sed quando quis alterius nomine agit, ita eius personam induit, ut perinde ac ipse loquatur.* Sed, quod non dissimulamus, hoc interpretamentum displicet nobis, & tale est, ut loca V. T. quæ de angelo Dei increato agunt, pari modo peruertere possent. Atqui sicut fratres Iosephi, dicentes v. 9.

Talem atriensis Iosephus egit in domo Potipharis Gen. XXXIX, 4. & habuit postea vicissim in sua domo c. c. XLIII, 16. 19 c. XLIV, 1. 4. 9. 10. quod postresum commentum vindicatur ab interpretamento Clerici.

& v. 16. *erimus domino meo serui*, non Iosephi personam, sed ipsum atriensem eius innunt; ita & atriensis, vbi dicit, *apud quem repertus fuerit scyphus, is mihi seruus erit*, pariter non heri fui, sed suam ipsius personam agit: ac ideo quidem pro auctoritate & imperio loquitur, quod is *præesset toti domui Iosephi* v. 2. 4. & (quod de villico Abrahami c. XXIV, 2. dicebatur) *dominaretur omnibus quæ ipsi erant*.

Pietas, fo-
mes, indu-
striæ seruilis,
adiunctum
habens sin-
gularem Dei
benedictio-
nem.

§. XI. Ceterum cum prosperitas & incrementa rei familiaris a fide, industria & dexteritate familiæ magnam partem pendeant; & vero familiæ fidem, industriam & dexteritatem nihil æque excitet, conseruet, alatque, quam timor Numinis: beatus igitur prædicandus paterfamilias, cui serui seruæque obtigerunt ii, quibus agendi principium & fundamentum sit pietas. Horum enim seruitia talia prorsus erunt, qualia a piis servis exigit Apostolus Eph. VI, 5-8. & Col. III, 22-25. nempe cum timore & tremore, in simplicitate cordis, veluti Christo ipsi seruirent: non ad adspectum oculi, quasi hominibus tantum placere cuperent, sed tanquam serui Christi, cetera. Potestne dubium esse, quin DEVS eiusmodi piorum seruorum seruorumque opus, quod, in fide & propter DEVM ipsum fit, indeque earum gratumque ei existit, singulari benedictione fortunaturus sit? Immo vero Labanus, licet parum religiosus ac fidus erga DEVM, tamen sensit, DEVM benedixisse sibi propter Iacobum, pium generum & operarium, Gen. XXX, 27. 30. Idem & Potiphari vsu venit, qui, cum animaduertisset, Dominum adesse Iosepho, & omnia eius opera fortunare, eum familiæ suæ præfecit: quo facto, benedixit Dominus domui Aegyptii propter Iosephum, & fuit benedictio Domini in omnibus, quæ erant ei, tum in domo, tum in agris c. XXXIX, 2-6.

Patriarchæ
familiam su-
am ad piera-
tem instrue-
runt: quod
testimonio
Gen. XVIII.

§. XII. Quam ob rem persuasum habemus, pios patriarchas non liberos solum suos, verum etiam seruos seruasque, ad veri DEI cultum ac timorem diligenter atque solícite instituisse. Cuius persuasionis nostræ argumentum est, non quidem quod Gen. XIV, 14. isti CCCXVIII. serui, ab Abrahamo con-

tra foederatos reges educti, vocantur חניכין *instructi*, seu *initiati eius*; quod Cl. BOHNERVS in Institut. Theol. catech. 19 & exemplis probatur. A. CIOCCCXXVII. Altdorffii impressis, ad catechetica eorum institutionem retulit: (quoniam enim de militia illic agitur, & vero חנך, sicut de domo vsurpatum, primum eius vsus, ita de homine, primum eius tentamen denotat; igitur cum IAC. GVSSETIO Comment. L. H. p. 268. malumus per *initiatos* illos intelligere tirones, prima hac vice militiae adhibitos.) sed locus nostra sententia clarissimus Gen. XVIII, 19. vbi DEVS de Abrahamo, *Agnoui eum*, inquit, *propterea, ut praecipiat filiis suis & domui suae post se, ut obseruent viam Domini, ad faciendum iustitiam & ius*. Et loquuntur id ipsum exempla familiae Abrahamicae, in Genesi nobis consignata. Primo enim *Hagara* Aegyptia, quamvis aduersus heram suam contumax aliquamdiu & arrogans fuisset, tamen, cum ab Angelo, hoc est, Filio Dei, in fuga correpta fuisset, eum non solum agnoscit praedicatque pie, *Tu es*, inquit, *Deus visionis*, cetera, Gen. XVI, 13. sed etiam mandato illius obsequens, ad heram reuersa, se subiicit ei v. 9. Deinde multo illustrius exemplum est *Eliezer*, Abrahami atrien- sis, vtpote cuius tanta in Deum fuit fides atque religio, vt historiam eius legentibus non possit non aedificationi esse, Gen. XXIV, 12. seqq. Tum vero tota seruorum Abrahami cohors, iubente DEO, cum hero suo sacramentum circumcisionis admittit c. XVII, 17. quod sane vix futurum fuisset, si serui isti adhuc idololatrae, nec ad veri Dei cognitionem ab Abrahamo instructi fuissent. Ac adeo, quod Act. XVI, 14. de *Lydia* dicitur, *baptizata est, & domus ipsius*; & v. 34. de commentariensi Philipporum urbis, *credidit Deo πανοικί*, seu *cum tota familia*; id Abrahamo aptari suo modo potest: vtpote qui credidit Deo, & circumcisus est, cum tota familia; inque domo sua habuit integram ecclesiam, plane vt Apostolus Rom. XVI, 5. Priscillam Aquilamque salutatur, καὶ τὴν κατὰ οἶκον αὐτῶν ἐκκλησίαν. Conf. 1 Cor. XVI, 9. & Philem. v. 2.

§. XIII. Considerauimus hucusque patriarcharum famili- Loto & Is-
B. 3; am: coto fixa ali-

quando, regulariter vero Patriarchis tralatitia fuerunt habitacula, seu tentoria.

am: sequitur nunc, ut *habitacula* illorum pari modo contem-
plemur. Ista autem vel *tralatitia* fuerunt, vel *fixa*: hæc בתים
seu *domus*, strictiore quidem significato; illa vero אהלים *ten-*
toria, & quæ pastoritiæ vitæ in primis ad commodata erant,
מקנה אהלי tentoria pecoris, seu *pecuaria* 2 Par. XIV, 14. vel
per hendiadyn אהל ומקנה tentoria & pecus Gen. IV, 19. vel
אהל רעי tentoria pastoritia Esa. XXXVIII, 12. vel denique
משכנות הרעים *tabernacula pastorum* Cant. I, 8. Hebræis ad-
pellata sunt. Quod autem בתים *domus*, & אהלים *tentoria*,
strictius accepta, illud domicilia fixa atque stabilia, hoc migrato-
ria, portatilia & tralatitia, denotet, id (ut alia loca mittamus)
nobis constare potest ex Ier. XXX, 7. ubi Ionadabus Rechabi-
lius familiæ suæ præcipit: ובית לא תבנו Et domum ne ædi-
ficate, כי באהלים תשבו כל ימיכם sed in tentoriis habitate
omnibus diebus vestris. Quod igitur ad patriarchas attinet,
verum est quidem, quod non solum Lotus, cum a patruo Abra-
hamo digressus, tentoria variis in locis Cananæ fixisset, tan-
dem, ubi Sodomam usque progressus esset, Gen. XIII, 12. fi-
xum ibi statuerit domicilium, domumque ad excidium usque
urbis habuerit stabilem, c. XIX, 2. seqq. sed etiam Iacobus, ex
Mesopotamia redux, apud Succotham in Peræa domum ædifi-
cauerit sibi, c. XXXIII, 17. Quemadmodum autem Ven. 10.
FRANC. BVDDEVS Hist. Eccl. V. T. part. I. p. 415. seq. recte
ostendit, Iacobum domum hanc pro familia sua ædificauisse,
reieto Iudaico commento PSEUDO-IONATHANIS, qui
eam in בית מדרשא, seu *academiam*, transformare ausus est:
ita credibile tamen est, eandem domum Iacobi rude tantum
& extemporale opus fuisse, sine artificio, cultu, splendore,
pompa. Aedificata est enim in itinere, cum Iacobus adhuc
in via esset, nec dum subsistere illis in locis, sed plus ultra ad
patrem Isaacum in australes Palæstinæ partes pergere destina-
visset, coll. Gen. XXXI, 18. cum c. XXXV, 27. Vnde interie-
cto aliquo temporis interuallo, probabiliter cum Iacobus fessum
ex

ex longo itinere pecus temporariis pascuis ibi locorum refecisset, domus illa rursus relicta, iterque Sichemum versus continuatum est. A quo tempore Iacobus denuo, sicuti antehac, sub tentoriis vitam degit, c. XXXIII, 18. Exemplo Abrahami & Isaaci, qui & ipsi tentoriis vsi sunt, eaque, prout commodum esset, & suppeterent pascua, modo *fixerunt*, quod Verbis נָחַם *metari, castrametari*, & נָטַח *tendere*, exprimitur, c. XII, 8. c. XXVI, 17. 25. c. XXXIII, 18. 19. c. XXXV, 21. modo *refixerunt*, & refixa aliorum *mouerunt*, quod Hebræis הִנְחִיחַ *transferre* dicitur c. XII, 8. c. XXVI, 22. sicuti *varias sub tentoriis stationes* denominatiuum designat verbum נָחַם *tetendit*, vel *tentoria habuit*, Gen. XIII, 12. 18.

§. XIV. Et fuerunt utique patriarcharum statui tentoria, quam fixa domicilia, ad commodatiora. Etenim Abrahamus, Isaacus, Iacobus, licet iteratam promissionem possidendæ olim Cananæ diuinitus accepissent; tamen, quoad ipsi vixerunt, huius promissionis complementum nondum viderunt: utpote cui Deus certum aliquod tempus in futuris demum ætatibus præfixerat. Igitur per omnem vitam fuerunt גֵּרִים וְתוֹשְׁבֵי אֶרֶץ *peregrini tantum & inquilini*, Gen. XXIII, 4. c. XLVII, 9. qui, ut Apostolus ait, *in fide mortui sunt, non accipientes promissiones, sed eminens eas conspiciati, & persuasi, ac salutantes, fassique, ὅτι ἔθνη καὶ παρεπίδημοί εἰσιν ἐπὶ τῆς γῆς, quod peregrini & aduenæ sint super terra*, Hebr. XI, 13. Atqui his, qui peregrini sunt, quique instabiles habent fedes, tentoria potius, quam domus fixæ, conueniunt. Viatores enim in Oriente, tentoria secum ferre solent, Ier. IX, 1. Vnde Apostolus I. c. de Abrahamo, *fide, inquit, peregrinatus est in terra promissionis tanquam peregrina, ἐν σκηναῖς κατοικήσας, in tentoriis habitans, cum Isaaco & Iacobo, cohæredibus promissionis eiusdem. Expectabat enim urbem fundamenta habentem, cuius artifex & edificator est Deus, v. 9. 10.* Accedit, quod patriarchæ (ut superiore Dissertatione §. XI. demonstraui) professione fuerunt homines pecuarii, nomades, *scenitæ*: quibus, quia pascua

cum

cum gregibus suis sequuntur, & de loco ad locum vagantur, tentoria seu σκηναι, a quibus & *scenitarum* nomen obtinuerunt, commodiora quam domus existunt.

Tentoria sub
arboribus fi-
xa, iucundi-
tatis ac um-
bræ caussa.

§. XV. Verisimile est autem, patriarchas solitos esse tentoria sua aut *sub arboribus*, aut iuxta illas figere; idque generatim iucunditatis, speciatim vero umbræ ac refrigerii caussa. Hinc enim Abrahamus, quum, tempore meridiano in ostio tentorii sui sedens, hospites viros tres ad se divertere animadvertisset, occurrens eis, rogavit: *Ne quaeso, transeas a seruo tuo: - - lauate pedes vestros, & recumbite* תחת הָעֵץ *sub arbore ista*, Gen. XVIII, 1-4. & quum illi precibus eius adnuentes, adcubuissent, legitur Abrahamus *iuxta eos stetisse* prope tentorium SUB ARBORE, administrandum eis v. 8. 9. ac denique *ostium tentorii*, siue ipsius Abrahami, siue Saræ, legitur fuisse *a tergo Domini*, qui conui-væ instar sub arbore discubuerat, v. 10. Et ut eiusdem rei plures possunt esse fines, sic est verisimile, לֵשֶׁן seu *lu-cum*, quem Abrahamus plantavit, præter vsum sacrum, cui præcipue destinatus erat, etiam ad iucunditatem habitatio-nis simul comparatum fuisse: prius quidem superiore differ-tatione a nobis ostensum est §. IX. p. 28. posterius vero colli-gimus ex analogo exemplo *Sauli* regis, qui, pari probabiliter caussa, *habitavit*, hoc est, sub tentorio degit, תחת האשל ברמה *sub luco in excelsu* vrbis Gibeæ, 1 Sam. XXII, 6. sicuti idem *Saulus* alio tempore degit *sub malo punica*, quæ fuit apud Migro-nam, c. XIV, 2. & *Debora* prophetis contra תחת תמר דבורה *sub palma*, a se sic dicta, *Debora*, Iud. IV, 5.

Mulierum a
viris separa-
ta domici-
lia.

§. XVI. Porro mulieres tentoria & habitacula a viris se-parata habuerunt; more, quem Oriens non solum priscis sæculis vna cum Græcia tenuit, sed etiam hodiernum magna ex parte servat. Quod priusquam ex patriarchali historia edif-feramus, iuuabit, vel vnicum illum, quanquam ipsis pueris no-tissimum locum ex præfatione CORNELII NEPOTIS adferre: *Quem Romanorum, inquit, pudet, uxorem ducere in conuiuium?*

aut

aut cuius mater familias non primum locum tenet ædium, atque in celebritate versatur? Quod multo fit aliter in Græcia. Nam neque in conuiuium adhibetur, nisi propinquorum: (quomodo & filiæ Iobi in conuiuium fratrum vna adcubuerunt, Iob. I, 4.) neque sedet, nisi in interiore parte ædium, quæ gynæconitis adpellatur, quo nemo accedit, nisi propinqua cognatione coniunctus. Videlicet Oriens est, & fuit, multo religiosior cautiorque in admit-tenda familiarior hominum diuersi sexus conuersatione, quam Occidens. Hinc Noomis, in patriam ex Moabitide re- versura, ambabus nuribus suis, *euntes, inquit, reuertimini, quæ- que in domum, non patris, (quem tamen si non vtraque, Rutha saltem superstitem tum habuit, coll. Ruth. II, 11.) sed matris suæ, c. I, 8.* Indidemque sponsa Salomonea mystica sponso, *abducam te, pariter inquit, in domum matris meæ, & in concla- ve genitricis meæ, Cant. III, 4. & c. VIII, 2.* quod certe, si typus & littera spectetur, ex hoc separatæ mulierum habitationis ri- tu in Oriente illustrandum non minus est, quam illud Ps. CXXVIII, 3. *Vxor tua futura est instar vitis, בִּירְכָתִי בֵּיתְךָ,* hoc est, (vt Nepotiana phrasi vtamur,) *in interiore parte ædi- um, quæ gynæconitis adpellatur.* Hæc vbi præfati sumus, nostri memores instituti ad patriarchalem reuertimur œconomiam, & quod de separatis virorum mulierumque habitationibus diximus, firmaturi, prouocamus tum ad Gen. XXIV, 28. vbi Rebecca, quum audisset, Abrahami seruum hunc esse, qui se monili & armillis aureis donauisset, *currens indicauit domui, non patris, sed matris suæ; & v. 67. vbi Isaacus sponsam Re- beccam introduxit in tentorium Saræ matris suæ; tum ad c. XXX, 16. vbi Lea, Iacobo vesperi ex agro venienti obuiam pro- cedens, ad me, inquit, venies.* Ad quem locum R. SAL. BEN MELECH in Michlal Iophi recte notat: *idest, in tentorium me- um venies; quoniam singulis separata fuere tentoria; sicuti scriptum est Gen. XXXI, 33. Et ingressas est Laban in tentorium Iacobi, & in tentorium Leæ, & in tentorium duarum ancillarum, - - cumque exisset e tentorio Leæ, ingressus est in tentorium Rachele.*

A tentoriis,
quæ homi-
num vñbus
inferuere,
diuersa fue-
runt Suc-
coth, seu
frondea tu-
guria pro pe-
core.

§. XVII. Ceterum a *tentoriis*, quæ Hebræis אֹהֶל vel מִשְׁכָּנָה adpellantur, quæque hætenus a nobis descri-
pta sunt, probe distinguenda sunt סֹכֶת *tabernacula* seu
tuguria, quæ Iacobus, ex Mesopotamia in Cananæam reuertens,
ultra Iordanem, prope locum *Succoth*, ab his ipsis tabernacu-
lis dictum, pro pecore suo fecisse legitur Gen. XXXIII, 17. *Ia-
cobus mouit versus Succoth, & ædificauit sibi domum: pecori ve-
ro suo fecit succoth, seu tentoria, unde & nomen vo-
cauit succoth.* Illa enim pro *hominibus*; hæc vero, vt
locus modo allegatus habebat, pro *pecore* fuerunt: illa item,
cortinis seu *aulæis* tensa, hæc vero, specialiore significato ac-
cepta, *ramis, frondibus foliisque* arborum tecta fuerunt, qua-
lia in festis diebus τῆς σκηνοπηγίας ab Israelitis postea fieri sunt
solita, Leu. XXIII, 34. 40. 42. & Neh. VIII, 15. Igitur taberna-
cula illa frondea Iacobo fuerunt loco stabulorum, ad cogendum
pecus, vt in opacarum frondium ramorumque vmbra com-
mode requiesceret, meridiano in primis tempore, cuius æstus
gregibus in Oriente noxius valde ac permolestus est. Vid. quæ
superiore *Dissert.* §. XVI. p. 35. sq. de meridiano pecoris recu-
bitu iam diximus. Et quemadmodum hæc ipsa *tuguria* He-
bræis dicta sunt סֹכֶת, quasi *teguria, tegumenta, umbracula, a
סָכַת texit, obumbravit*; ita dubium nobis non est, quin indi-
dem Græcis adpellati sint σηκοί, hoc est, vti SVIDAS vocem
interpretatur, αἱ τῶν βοσκημάτων ἐπαύλεις, *gregum stabula*, seu
mansiones & caulae: vt quum apud HOMERVM Odyss. 9. v. 219.
legitur:

— — — εἶνοντο δὲ σηκοὶ
ἀγῶν, ἥδ' ἐρίφων.

Plenæ autem erant caulae agnis & hædis. Quæ etymologia est facilis
& inadfectata; sicuti græculam contra redolet vanitatem illa,
quam SVIDAS adfert, vocis origination, quasi σηκοὶ dicti sint
παρὰ τὸ σώζειν, *quod seruent* pecudes, vel παρὰ τὸ ἐκείσι σῆκειν,
quod illic stent. Adeo vt vel hinc adpareat, non Græcam lin-
guam Hebrææ, sed Hebræam Græcæ origines dedisse; secus ac
nuper persuadere nobis *Helmstadiensis* voluit *Philologus*.

§. XVIII.

§. XVIII. Ab *habitatibus* patriarcharum conuertimur nunc ad illorum *viatum*, contemplaturi, quis fuerit eorum tum *cibus* tum *potus*. Et ad cibos quidem pertinent herbae ac olera, arborumque fructus; item cicera, maximeque panis; porro, carnes animantium, ac denique lac & butyrum. De *herbis, oleribus, frumento, ciceribus, arborumque fructibus*, in cibum homini iam ante lapsum in paradiso destinatis, diuinam legimus constitutionem Gen. I, 29. *Ecce, dedi vobis omnem herbam habentem semen, quae in superficie totius terrae est; & omnem arborem, in qua est fructus arboris, habentem semen: vobis erit, tum haec tum illa, in escam.* Et de arborum fructibus c. II, 16. *De omni arbore horti* (excepta tantum illa, quae a cognitione boni & mali nomen habuit) *comedendo comedes.* De pane vero, hoc est, pistorio opere ex frumentis parato, dubitari potest, locumne iam in paradiso habuerit; quoniam non constat nobis, num protoplasti tamdiu in statu concreatae a Deo integritatis, ac adeo in paradiso, perseuerauerint, ut frumentum metere, messumque molere, ac pistorio opere parare potuerint. Loquitur tamen Deus de illo, tanquam de re iam existente & hoc nomine suo nota, ad Adamum e paradiso mox expellendum, Gen. III, 19. *In sudore vultus tui comedes PANEM:* nisi forte *panis* heic (vti alias saepe fit) pro cibo quolibet, per synecdochen, veniat. Quod si vel maxime panem ex farina pistum primi mortales nondum habuerunt, tamen fieri potuit, ut vel virides comederint frumenti spicas, manibus vultas frictasque; (quod a discipulis Christi, in sabbato δευτερον πρῶτον per segetes transeuntibus, factum legimus Matth. XII, 1.) vel igne tostas manducauerint. Certe IO. CLERICVS Comment. ad Leu. II, 14. vbi populus Israeliticus iubetur donarium primitiarum offerre אכיל קלוי באש גרש כרמל *spicam tostam igne, contusamque aristam viridem*, haec adnotat: *Videtur, inquit, haec esse imago antiquissimi cibi, cum homines panem nondum pinserent; aristas, nimirum, virentes contusas comedebant, deinde easdem torrere didicerunt.* Atque

hinc etiam polentam & pultem faciebant, ante inuentum panis vsum. Eadem autem terræ genimina, quæ ante, etiam post lapsum hominibus in vsum cibi indulta a Deo sunt; hoc solo discrimine, quod ante lapsum vescerentur herbis fructibusque paradisi, post lapsum vero agrestibus terræ nouercalis & iniquæ, ac pane cum sudore vultus parato: Gen. III, 18. 19. Comedes herbam agri; in sudore vultus tui comedes panem. Ad quem locum recte A. RIVETVS Exercit. 38. Non hoc, inquit, voluit Deus, (quasi Adamus deinceps vilibus agrorum herbis cum belluis victurus esset) qui & antea in prima constitutione rerum omnium, ante peccati statum Gen. I, 10. ita distinxit herbas, quæ in cibum hominum cedere debebant, ab aliis, quæ ceteris animantibus concessæ erant: sed id tantum prædixit, herbas illas seementantes semen, ut frumentum, triticum, secale, varia leguminum & olerum genera, quibus etiam nunc vtimur, non sponte aut facile prouentura, ut antea, sed post labores maximos, satis parce colligenda; quasi diceret: Comedes herbam tantis laboribus satam & altam; cum ego antea sine sudore, spinis & tribulis, eam tibi velut præparatam & sponte crescentem tibi dedissem. Et tamen, quæ mirifica est Dei erga homines misericordia & benignitas, non obstante illa maledictione diuina, quam terræ attraxit protoplastorum peccatum Gen. III, 17. 18. post lapsum quoque largitur panem pinguem, regalesque delicias, quibus Aleritidem in primis abundaturam Iacobus ominatus est c. XLIX, 20. Et quanquam diluuii interuentus visus fuerat spem omnem prouentuum terræ mortalibus erepturus esse, tamen & post illud Deus clementissimo decreto, adhuc, inquit, omnibus diebus terræ sementis & messis - non cessabunt c. IX, 22. Vnde Isaacus Iacobo, Esau personam gerenti, bene precaturus, det tibi, inquit, Deus frumentum & mustum, c. XXVII, 28. & de eodem, Esauo loquens, v. 37. ait: Frumento & musto suffulſeum. In primis legimus, lentes Esauo pro cupediis fuisse, ita ut pro consequendis illis, quanquam leuissimo animo, fratri ius primogenituræ vendere non dubitauerit c. XXV, 29. seqq.

Legi-

Legimus item, in deliciis fuisse *subcinericias placentas*, e *similagine* factas: utpote quas Abrahamus maximæ dignationis conuiuis, vna cum butyro & lacte, carnibusque vituli delicati & præstantis, adposuit c. XVIII, 6. 7. 8. De illis adi, si lubet, SAM. BOCHARTVM in Hieroz. P. I. col. 326. seqq. aut Notas in *Bibl. Halens.* Hof. VII, 8. Denique quod ad arborarios fructus, Patriarcharum vsibus, præter alia illorum genera, inferuierunt *resina, mel, styrax, stacte, pistacia & amygdala*, uti ex Iacobi historia constat Gen. XLIII, 11.

§. XIX. De *carnibus* ambigi forte queat, vtrum iam ante diluuium, an post illud demum ad esum hominibus concessæ fuerint. Qui posterius adserunt, primo sententiam suam fundant in loco Gen. I, 29. vbi, quum Deus hominibus *omnem herbam sementantem, omnemque arborem, in qua sit fructus*, in cibum designat, contra de animalium carnibus altum est silentium. Vnde IO. CLERICVS Comm. ad l. c. notat: *Heic herba & fructus alimentum hominis memorantur, ommissa brutorum carne; unde viri eruditi ἡγεωφάγῳ initio vsitatam non fuisse colligunt. Sane carnis crudæ voratio ferarum cum sit, eius coctio videtur hominum rudiorum ingenium superasse; & cum fructus a natura ipsa cocti ad manum essent, sine ullo paratu, credibilius est, eos solos a primis parentibus adpetitos fuisse. Hinc & apud Græcos aurei sæculi epulæ fructus dicebantur. PYTHAGORAS apud OVIDIUM Metam. Lib. XV.*

*At vetus illa ætas, cui fecimus aurea nomen,
FOETIBVS arboreis, & quas humus educat HERBIS,
Fortunata fuit, nec polluit ora CRVORE.*

Fundantur & eo, quod Gen. IX, 3. Deus Noacho & familiæ eius post diluuium dicit: *Omne mouens se, quod est viuum, vobis erit in escam: sicut herbam viridem dedi vobis omne.* Vnde H. GROTIUS, quem hac in re sequitur IO. CLERICVS, colligit, ante diluuium ius quidem fuisse homini in animantia, ut, scilicet, lacte, lan, & mortuorum suo fato exuiis, utque viuientium labore, quo suus minueretur, ad ferenda aut trahenda

onera vteretur; at non, vt ea in cibum verteret: frustra alioquin hic Noacho permitti, quod dudum licitum fuisset; cum præsertim Moses antea satis indicarit c. I, 29. herbas & fructus antediluvianis hominibus in victum datos. Quanquam vero inficiandum nobis non sit, rem ita implicitam & in ancipiti positam esse, vt, vtra sententiarum eligenda sit, difficulter admodum determinari queat, saltem cum plena certitudine & apodixi; tamen adlatæ rationes ita sunt comparatæ, vt patiantur exceptionem: & e diuerso contraria sententia argumentis non spernendis adstruitur. Nam primo, licet DEVS Gen. I, 29. pro cibis homini concessis solas herbas & fructus, omissa brutorum carne, memoret; tamen vnus positio non est alterius exclusio. Vnde contra H. GROTIUM, qui verbis mox insequentibus v. 30. *Omni vero bestię, & omni volucri cæli, & omni mouenti se super terram, in quocunque est anima viua, dedi omnem herbam viridem in escam*, crediderat, brutis solas herbas concedi, non fructus arborum; CLERICVS ipse recte obseruat, istiusmodi omissiones non esse nimium vrgendas; indeque ex verbis illis vix putat colligi posse, quasi bruta arborum fructibus, quibus aues aliaque animantia vesci solent, aut carniuoræ bestię animalium esu initio abstinerint. Deinde si carniū esus homini a DEO non est concessus verbis v. 29. (quod tamen Sam. Bochart. Hieroz. P. I. lib. I. p. II. asserit, contendens, illud, *Vobis id erit in cibum* v. 29. non solum ad plantas referri, sed etiam ad animalia, de quibus præcedenti versu actum fuerat.) concessus est tamen, quanquam implicate & generalius, verbis superioribus v. 28. *Dominamini piscibus maris, & volucribus cæli, & omni bestię, quæ mouet se super terram*. Quod vero obiicitur, coctionem carnis ad esum, videri hominum rudiorum ingenium superauisse; id tanti non esse videtur, vt, quod vult CLERICVS, nobis persuadeat. Legimus enim, homines iam ante diluuiū coluisse artes, v. g. musicam, ac metallicam imprimis, Gen. IV, 21. 22. Atqui metalla inuenire, fodere, perficere, fabricare, cetera, quam ardua res est, & quan-

quanti ingenii ! Ea igitur si primorum hominum ingenium non superauit, forte, quod nutu & prouidentia DEI singulari adiuti sunt; de carnis ad esum paratu, quæ simplicior & facilioris indaginis res est, id multo minus dici potest: quamuis ceteroqui lubentes largiamur, cum temporis progressu artes quoque magis ac magis excultas esse. Nec fortius stringit argumentum ex fabulis Græcorum de aurei sæculi epulis desumptum. Quamuis enim fabularum integumentis aliquando sint antiquissimæ historiæ inuolutæ; tamen fabulæ sæpe sunt fabulæ, id est, inanissima nugacium hominum commenta, quibus vix tuto creditur. Sed quid de palmario illo dicemus loco, Gen. IX, 3. *Omne mouens se, quod est viuum, vobis in escam erit; sicut herbam viridem dedi vobis omne?* Nihil enim pro neganda ante diluuium *πρωφάγλα* clarius videtur dici potuisse. At vero, si loci illius contextum penitus consideraueris; verisimile euadet, verbis modo adlatis non nouum hominibus a Deo conferri beneficium, sed vetus illud, quo iam pridem vsi erant, vti saltem potuerant, post diluuium confirmari. Ut enim, cum inducto terris propter hominum malitiam diluuium, natura rerum turbata esset, igitur, finito illo, Deus, vt hominum genus ab eiusdem diluuii metu in posterum liberaret, dixit ad cor suum c. VIII, 21. 22. *Non pergam amplius percutere omne viuum, quemadmodum feci. ADHVC* (vti iam ante diluuium, ita nunc post illud porro) *omnibus diebus terræ, sementis & messis, frigus & æstus, æstas & hiems, dies & nox non cessabunt.* Cum hoc igitur clementissimo Dei decreto statim coniungitur benedictio illa, quæ Deus Noachum filiosque eius impertit, c. IX, 1. 2. *Benedixit Deus Noacho & filiis eius, dicens eis: Fructuosi este, & auge- scite, ac replete terram: & timor vestri, terrorque, sit super omnem bestiam terræ, & super omnem volucrem cæli; cum omni, quod mouet se in terra, & cum omnibus piscibus maris, in manum vestram data sunt.* Hæc omnia quemadmodum non noua, sed vetera sunt beneficia, quæ Deus hominum generi post diluuium instaurat atque confirmat, coll. Gen. I, 28, sic & hoc, quod sequi-

sequitur ibidem v. 3. *Omne mouens se, quod est viuum, vobis* (vt antehac, ita porro) *erit in cibum*. Nam *vt herbam viridem, dedi* (iam olim, & nunc vobis *de*, reddo, restituo) *vobis omne*; ita scilicet, vt licitissime animalium carne vesci possitis, haud aliter quam herbis. Quod vero Deus carnis esum nominatim confirmat, id nobis fieri videtur cum respectu ad subiunctam prohibitionem homicidii v. 5. 6. 7. q. d. Iugulauerunt homines ante diluuium pecora, idque ad esum; iugularunt vero & homines, per vim & truculentiam; vtpote quater terra ab ipsis repleta fuerat c. VI, 13. illud vobis posthac quoque concessum, hoc vero sub seuerissimi supplicii comminatione abhinc interdictum esto. Sed plura non addimus, cum videamus, argumentum hoc, de licito & vsitato carniū esu ante diluuium, sufficienter a Venerandis Viris, IO. FRANC. BVDDEO, in Hist. Eccl. V. T. Part. I. p. 185. seqq. & IOACH. LANGIO, in Hist. Eccl. V. T. p. 20. 21. pertractatum esse: quo lectores nostros, si volupe eis sit, amandamus.

Post diluui-
um animalia
quidem quæ
libet ad esum
licita, sed
non omnia
vsitata, nec
nisi sanguine
separato.

§. XX. Quidquid autem horum sit tandem, siue comederint primi homines carnem, siue non comederint; post cataclysmum certe licita fuerunt ad esum animalia quælibet, nisi natura hominum ipsa ab illis comedendis refugeret. Vt enim herbæ & olera, sic animalia Noacho & filiis concessa sunt Gen. IX, 3. *OMNE mouens se, quod est viuum, vobis erit in cibum: sicut herbam viridem dedi vobis OMNE*. Nul- lum igitur heic discrimen ciborum mundorum immundorum- que, saltem ex lege. Nam et sic c. VII, 2. Noachus de *pecoribus mundis* septena, de *immundis* vero bina tantum in arcam ad- mittere iussus sit; recte tamen interpretes monent, *munda* dici quæ vel in sacrificiis eo tempore probauerit Deus, vel humano vsui conuenientiora & consuetiora fuerint. Ac adeo libertas hæc circa carniū quarumlibet esum, qua Patriarchæ vsi sunt, prius restricta non fuit, quam donec interuenisset lex Leuitica: quæ tamen & ipsa non æternum valere, sed tantum μέγιστα ἔσθαι τοῖς Ἰουδαίοις & populo Iudaico incumbere debuit Hebr. IX, 10.

Id

Id enim est, quod tanquam veteris, eiusque sincerioris Theologiae Iudaicae venerandum monumentum, in ipso reperitur Iudaeorum MEDRASCH THILLIM f. 68. d. Vbi, *quid est illud* inquiunt, SOLVIT VINCTOS, siue (vt magistri illi Hebraei capiunt) VINCTA? Ps. CXLVI, 7. *Sunt qui id ita explicant: Omne pecus, quod pro impuro habetur in seculo praesenti, Deus post hac pro puro declaraturus est. Sic enim dicitur Coh. I, 9. QVOD FUIT, IDEM EST QVOD ERIT, cetera. Ecquid igitur illud est quod fuit? Munda fuerunt antehac (animantia quaelibet) Noachidis. Nam sic habetur Gen. IX, 3. Velut herbam viridem dedi vobis omne. Quemadmodum igitur herba viridis uniuersa, sic & uniuersa animantia hominibus initio concessa fuerant. Quare vero postmodum aliqua illorum prohibuit? Vt videret, quis verbis eius obsequuturus, quisue refragaturus esset. Sed futuro tempore (quod alias nomine dierum Messiae Iudaeis venire solet) Deus soluturus est vincta, id est, licita faciet quae illicita fuerant. Diximus, licita fuisse Noachidis uniuersa animantia; sed inde tamen non sequitur, singula singulis & vsitata fuisse. Nam v. g. suillam carnem in Patriarcharum cibus vix habuisse locum, id ipsi superiore Dissertat. §. XXV. p. 51. praeter alia ex alto illo in Genesi de suis silentio, collegimus. Licita item fuerunt, sed non sine necessaria conditione, quam Deus Gen. IX, 4. his verbis expressit: *Attamen carnem in anima sua, seu sanguine suo, ne comedatis.* Vbi notanda differentia legis patriarchalis a lege Leuitica. Haec enim prohibet esum sanguinis simpliciter, etiam effusi, & ab animali corpore separati, Leu. XVII, 14. illa vero non nisi carni adhuc inhaerentis, nec dum effusi ac seorsim positi: utpote quae vis est phraseos, *carnem in sanguine suo*; prout pluribus demonstrauit IAC. GVSSETIVS Comm. L. H. p. 525 De causis vero interdicti esus sanguinis vide, si placet, SAM. BOCHARTVM Hieroz. Part. I. lib. I. c. 2. Sic Abrahamus conuiuiis suis parauit vitulum tenerum atque praestantem, ex tempore maectatum c. XVIII, 7. 8. Isaacus vero ferina in primis delectatus est, ita vt libenter ea vesceretur,*

c. XXV, 28. Vnde Esauus, venationum studiosus, cupedias, prout amaret pater, facere iussus c. XXVII, 4. 31. Rebecca matre similes contra parante ex duobus hædis v. 9. 14. quod ne mirum videatur, obseruandum est, quod BOCHARTVS l.c. pag. 633. ex auctoribus tam sacris quam profanis demonstrauit, *Hædos* apud veteres, maximeque Hebræos, in deliciis fuisse.

Panis & aqua
pro cibo &
potu quoli-
bet. Aqua
potus ordi-
narius, vi-
num lautior.

§. XXI. Quemadmodum in ciborum genere *panis* prin-
cipem tenuit locum, adeo vt synecdochice aliquando pro cibo
quolibet veniat, v. g. Gen. III, 19. *In sudore vultus tui comedes
panem*; sic *aqua* in Palæstina, maximeque patriarchali æuo,
vfitatissime pro potu deferuit. Hoc enim inde colligimus,
quod *panis & aqua* hic illic omne tum ciborum tum potuum
genus comprehendit, vt Exod. XXIII, 25. *Benedicet Dominus
pani tuo, & aquæ tuæ*; c. XXXIV, 28. *Panem non comedit Moyses,
& aquam non bibit.* Esa. XXXIII, 16. *Panis ipsius dabitur ei,
aqua ipsius perennis erit.* Quod ideo obseruamus, ne forte,
quum Gen. XXI, 14. de Abrahamo relatum legimus, eum Ha-
garam, vna cum Ismaele filio dimissam, nonnisi *pane & vire
aquæ* loco viatici instruxisse, duritiei nomine patriarcham in-
dulgentissimum cum aliquibus postulemus; quasi qui pelli-
cem, filiumque ex ea susceptum, haud meliore habuerit loco,
quam maleficos homines, qui, si quid commiserint criminis,
in carcerem dati, pane & aqua victitant, werden mit Wasser und
Brodt gespeiset. Sed, nimirum, euanescit hæc species duriti-
ei & tenacitatis, si quidem reputemus, *panem* non excludere
opsonia, *aquam* vero tunc temporis, & ibi locorum, potum fu-
isse ordinarium. Adde, quod probabile sit, Abrahamum pel-
lici filioque, tunc in Pharanica deserta tendentibus v. 21. nisi se
sustentare ipsi possent, de victu prospexisse: sicut c. XXV, 6. di-
serte *pellicum filiis dona dedisse* legitur. Sic, vt duritiei speci-
em porro ab Abrahamo depellamus, Isaacus atque Rebecca
Iacobum filium, tenerrime dilectum, cum iter Carrense in-
gressurus esset, non vacuum quidem prorsus, (nam v. g. oleo
instructus erat, quo erectam a se statuam perfudit c. XXVIII, 18.)

atta-

attamen satis parce & (vt nostro quidem sæculo luxurianti ac delicatulo videri queat) miserabiliter instructum, dimiserunt: adeo, vt redux tandem e Mesopotamia, dicere posset: *Baculo meo solo instructus transi olim Iordanem hunc, nunc vero in duo euasi agmina*, Gen. XXXII, II. Cæterum captiuorum cibis in sacris litteris non *panis & aqua* simpliciter, sed cum epitheto demum לחם ומים לחם, *panis afflictionis, & aqua afflictionis*, vocitatur, vt I Reg. XXII, 27. vel לחם צר ומים לחם *panis angustiae, & aqua afflictionis*, vt Esa. XXX, 20. Interim existimandum non est, Patriarchas abstemios fuisse fortioris potus, ac meros ὑδροπότας, seu *aquæ potatores*. Nam *vinum* Noachus post diluuium bibit, primus eius (vt verisimile est) inuentor, Gen. IX, 20. 21. Melchisedecus item Abrahamo, a strage foederatorum regum reuerso, panem obtulit & *vinum*, vt fessum ex itinere, cum agmine ipsius, reficeret, c. XIV, 18. *Lotus* quoque, ex Sodomorum incendio in speluncam se cum filiabus recipiens, *vinum*, quanquam (vt mox dicemus) immoderatus hausit, c. XIX, 32. seqq. Sed & Iacobus, quum solemnem conuiuio animum patris recreaturus, paternamque benedictionem in se deriuaturus esset, Isaac præter cupedias *vinum* quoque proposuit c. XXVII, 25. indeque vicissim abundantiam *musti*, seu *vini*, ex paternis votis meruit v. 28. & Iudæ, filio suo, ominatus est, fore, vt *adliget asinum suum viti, & generoso palmiti pullum asinæ suæ, loturus vino vestimentum suum, & sanguine vuarum tegumentum suum*, c. XLIX, II. *Vinum* nempe ex præstantissimis Dei donis est, quod (vt ex Iothami apologo loquamur) *lætificat Deum & homines*, Iud. IX, 13. Vnde Dauid argumentum laudandi Creatoris sumit Ps. CIV, 15. *Et vinum*, inquit, crescere facit Deus, quod *exhilarat cor hominis*. Et Salomo moderatum ordinatumque eius vsum celebraturus, ait Prou. XXXI, 6. *Date Siceram pereunti, & vinum mæstis anima: vt bibens obliuiscatur paupertatis suæ, & ærumnæ suæ ne meminerit amplius*. Quo magis mirum est, eo processisse Muhammedem, vt in *Coran*. Sur. V.

v. 92. pronunciauerit, *vinum esse abominandam rem operis Satane*. An Patriarcharum tempore, præter aquam vinumque, etiam שכר *Sicera* in usu iam fuerit, haud quidem certo definiuerimus; quia nulla eius in Genesi mentio occurrit: fuit tamen Mosæico æuo nota, coll. Leu. X, 9. Num. VI, 3. Deut. XXIX, 5. Est autem *Sicera*, (vt HIERONYMVS ad Esa. XXVIII, 7. recte monet) *omnis potio, quæ inebriare potest, & statum mentis evertere, - - siue illa frumento, siue milio, pomorumque succo, & palmarum fructu, aut alio quolibet genere conficiatur*.

Patriarchæ
comederunt
biberuntque
in timore
Dei, & cum
gratiarum
actione con-
uiuia ege-
runt, sed sine
intemperan-
tia & luxu.
Noachi & Lo-
ti ebritas ad
commonefa-
tionem no-
stram scripta.

§. XX. Quod igitur ad victum, de quo hætenus diximus; comederunt sane biberuntque patriarchæ, non aliter ac ceteri homines sui æui: hac tamen differentia, vt hi quidem genio suo indulgentes, summa securitate, carnem cutemque pascere; nec Deo, sed ventri suo seruirent Rom. XVI, 18. indeque finem haberent τὴν ἀπώλειαν, Phil. III, 18. illi vero cibum potumque caperent, tanquam donum Dei, cum gratiarum actione, 1 Tim. IV, 3. 4. 5. & carnis curam non facerent ad concupiscentias Rom. XIII, 14. De antediluvianis, Noacho cœvis, Christus Luc. XVII, 27. ait: *Comederunt, biberunt, - - usque quo die ingressus est Noachus in arcam, & superueniens diluuium perdidit omnes*: pariterque de Sodomitis tempore Loti, v. 28. 29. *Comederunt, biberunt, cetera*; plane, vt Ezech. XVI, 49. *Ecce! inquit Deus, hæc fuit culpa Sodomæ sororis tuæ: fastus, saturitas panis, & tranquilla securitas fuit ei, ac filiabus ipsius, cetera*. Potro patriarchæ in peregrinis quidem humaniter lauteque excipiendis, præbendisque conuiujs (vbi id amicitiae ac decori leges exposcerent) liberales sese gesserunt, sed sine luxu & vanitate. Vt Abrahamus, Gen. XVIII, 2. seqq. Lotusque c. XIX, 1. seqq. ad quorum exempla respiciens Apostolus Hebr. XIII, 2. *Hospitalitatis, inquit, obliuisci nolite: per hanc enim aliqui vel ignari angelos excepere*. Isaacus item, qui venientibus ad se Abimelecho, eiusque ministris, conuiuium parauit, Gen. XXVI, 30. pariterque Iacobus, qui Labano focero cæterisque cognatis idem humanitatis officium præ-

præstitit c. XXXI, 54. Sed & die, quo Isaacus a lacte depul-
sus est, fecit Abrahamus *conuiuium ingens* c. XXI, 8. & nu-
ptiale Iacobi conuiuium (quanquam hoc forte ex instituto fo-
ceri, & more Charanensium potius, quam ex propria volunta-
te, cum de Isaac atque Rebeccæ nuptiis nihil istiusmodi legatur
c. XXIV, 67.) septiduanum fuit, c. XXIX, 27. Cætera vero
fuerunt moderati, paucis contenti, frugales, sobrii, & ab in-
temperantia siue in cibo siue in potu alienissimi, v. g. Iacobus,
qui in Mesopotamiam proficiscens a Deo nihil ultra vouit sibi,
quam *panem ad comedendum* c. XXVIII, 20. Excipiendi hic
vero sunt speciales casus, Noachi & Loti: quorum ille,
cum primus mortalium plantauisset vineam, bibit de vino, &
inebriatus est, c. IX, 21. hic vero vino, quod filiæ præbuerunt,
immoderatus hausto, ad incestum cum filiabus concubitus
inductus est, c. XIX, 32. seqq. tristi quidem exemplo, quod ve-
ro scriptum est πρὸς ὑμῶν ἡμεῖς 1 Cor. X, 11. auremque vellit
nobis, & admonet, vt meminerimus illius dicti Apostolici c.
VII, 31. *Qui vtuntur mundo hoc*, (ac adeo & cibo, potuque for-
tiore) *tanquam non abutentes*; item Salomonei illius Prou.
XXIII, 31. *Ne aspicias vinum, cum rutilauerit, cum dederit in ca-
lice colorem suum, blandeque ingressum fuerit*, cetera. Quan-
quam vero isti Patriarchæ non penitus hac in re excusandi sint,
ac minime quidem Lotus; tamen misericordia digni sunt: Noa-
chus, quod tanquam primus vini cultor vim generosi huius po-
tus ignorauerit; Lotus vero, quod a filiabus, perperam totum
hominum genus extinctum supponentibus, ac adeo, quasi ne-
cessitatis casus esset, prolem ex patre suo suscipere gestientibus,
veluti eum a mœrore refectionis essent, dolose circumuentus
fuerit.

§. XXIII. Venimus nunc ad vltimum tractationis nostræ **Vestes triste**
momentum, videlicet *amiclum* patriarchalem. De quo quum **lapsus nostri**
agere instituiamus, atque in vestium simul origines animum **monumen-**
conuertimus, sentimus nos in tristem nostri primorumque **tum.**
parentum lapsus recordationem deduci; idemque nobis ac-

cidere, quod pincernæ regis Aegypti, qui, notitiam Iosephi in carcere a se comparatam Pharaoni memoraturus, *Peccata mea*, inquit, *commemoranda mihi sunt hodie*, Gen. XLI, 9. Nam initio creationis, & quamdiu Adamus ac Eua in statu imaginis diuinæ perstiterunt, *ambo fuerunt nudi, homo & uxor eius, nec ipsos puduit*, Gen. II, 25. Quo loco *nuditas* non priuationis aut turpitudinis vocabulum, sed perfectionis atque honoris est, naturalem significans pulchritudinem, eamque ita consummatam, ut nihil plane deformitatis vitiique, quod pudoris esse posset, haberet, nec adscititio vlllo indigeret cultu, contenta proprio: sicut & illud, *nec ipsos puduit*, non impudentiam notat, quæ ad omnem turpitudinem dux est, sed negationem rei turpis, quæ pudorem excitare queat. Vnde B. SEB. SCHMIDIVS vertit: *neque enim pudoris causam habebant*. Et Paraphrastes Chald. Hierosolymitanus: *Et ignorarunt, quid esset erubescencia*. Erant quippe sicut infantes, ἀνάνοι, & sine peccati fomite, praua concupiscentia; ac *e contrario induti, loco indumenti, gloria Dei, & pietate*. Quod quale fuerit, pulcherrime explicat S. MACARIUS Hom. XII. §. 7. 8. & quod de Pseudo-propheta, alias parum casto, mirum est, ipse MVHAMMEDES Coran. Sur. VII, v. 25. 26. vbi, *Vestis pietatis*, inquit, *hæc est optima; hæc est de miraculis Dei*. -- *O filii Adami, ne decipiat vos Satanas, quemadmodum eiecit ambos parentes vestros e paradiso, auferens illis vestem suam, ut monstraret eis pudenda ipsorum*.

Post lapsum
demum tu-
pis subse-
quuta nudi-
tas: quam
ficulneis
subligaculis,
sed parum
apte, primi
homines
tentarunt
egere.

§. XXIV. Post lapsum vero primorum parentum, *aperiti sunt oculi illorum amborum, & cognouerunt, quod nudi essent*, Gen. III, 7. Vbi *oculorum* quidem *apertio*, quam memorat Moses, per antanaclasin sic dicitur ad magnifica illa seductoris serpentis promissa v. 5. *Nouit Deus, fore, ut, quo die comederitis de ea, (arbore, quæ est in medio horti,) aperiantur oculi vestri*. Concedit igitur Moses, factum id, quod serpens promiserat, luminaque aperta esse, verum non eo sensu, ut *essent* Protoplasti *sicuti Deus, scientes bonum & malum*, id est, perfectam habentes rerum omnium cognitionem; sed contrario signifi-

ficatu,

catu, vt magno suo pudore, & animi confusione, sentirent, se nudos vacuosque esse factos ab illa gloria & perfectione, in qua primitus a Deo creati fuissent; ac adeo veste imaginis diuinæ eum in modum spoliatos, vt, vbi turpitudinem suam occultarent, nullibi reperirent. Cum ergo fœdam hanc suam sensissent nuditatem, indeque pudor eos & ignominia occupauisset, *consuerunt folia ficus, feceruntque sibi* (vt l.c. additur) *חגרו*, hoc est, vt veteres interpretes reddiderunt, *perizomata*, seu *subligacula*, quibus inferiores tantum ac pudendas corporis partes tegerent, videlicet ab ea corporis parte, qua cingimur, atque deorsum. Quod autem MATTH. HILLERVS in Hierophyt. P. I. p. 155. ex FAGIO ad l.c. obseruat, *Folia ficus commoda ipsis visa, quibus tegerent pudenda sua: (Est enim fico folium maximum umbrosissimumque:)* cum tamen ad rem plane fuerit ineptam. Nec enim a corpore frigus arcere, nec in opere rustico durare potest: hiscit enim rimis, & a ventis laceratur. Fici foliis se adhuc tegunt, quotquot nuditatem ac turpitudinem suam, hoc est, malam conscientiam & peccata sua, variis operibus extra Christum obuielare conantur, qui, vbi increbuerit vox iudicii, sentient, se non posse consistere: quemadmodum nec Adam & Eva, audientes vocem Domini.

§.XXV. Quoniam igitur ficulnea folia ad rem parum apta fuerunt, *fecit Dominus Deus Adamo & uxori eius tunicas pelliceas, ac vestiuit eos*, Gen. III, 21. quæ pelliceæ tunicæ multo quidem, quam ficulnea perizomata, vtiliores commodioresque lapsis parentibus extiterunt: sed quum secundum paraphrasin Chaldaicam IONATHANIS illæ *pro pulchritudine ipsorum, qua exuti erant*, successerint, credibile est, ingens desiderium amissæ huius pulchritudinis apud protoplastos relictum fuisse. Patet autem ex loco adducto, primo, pelliceas vestes fuisse omnium antiquissimas, deinde, earum inuentionem ipsi deberi Deo. Quod ad prius, ipsi quodammodo consentiunt auctores ethnici. Nam

Substitutæ a Deo in ficulneorum tegumento- rum locum tunica pelliceæ. Quæritur vero, anne sic species maiestatorum pecorum fuerit extincta?

LUCRETIVS lib. V. cum docuisset, primos mortales nondum sciuisse

uti

Pellibus, & spoliis corpus vestire ferarum,
hæc subdit. *Inde casas - - ac pelles ignemque pararunt.*
Vide IO. CLERICVM Comm. ad l. c. qui tamen coacto interpretamento tum ex *subligaculis* modo dictis, tum ex *tunicis pelliceis* fatit *tabernacula*, foliis ramisque ficulneis, vel pellibus contacta. Quod vero ad posterius, libet nobis adscribere verba CLERICI l. c. *Illo tempore, inquit, necesse pene fuit, multa a Deo homines doceri, sine quibus miserum nimis fuisset humanum genus.* Θεὸς ἐνεμεν αὐτοῖς αὐτοῖς ἐπιταλῶν, ait PLATO in POLITICO, *ubi multa in hanc rem.* Cæterum, si lapsus Protoplastorum a creatione (vt verisimile est) non longe abfuit, quæritur ergo, quo modo utrique primorum parentum tunicae & pellibus paratae sint, vt species mactatorum pecorum, quorum exuviae hominibus vestiendis inseruierunt, non fuerint extinctae? Sed, nimirum, si ex analogia τῆς ἀνακλίσεως in diluvio iudicare licet, probabile est, animantia alia quidem gemina, seu per paria, alia vero septena creata fuisse, prout vel munda essent, vel immunda: plane vt tempore imminentis diluvii Deus Noacho, *de omni pecore mundo, inquit, accipies tibi septena, marem & femellam eius, & de pecore immundo bina, marem & femellam eius,* cetera, Gen. VII, 2. 3. Quod si supponatur, dubium illud adlatum solutu facile erit, cum licet de mundis animantibus aliqua siue ad esum, siue ad victimas, mactata fuerint, tamen in saluo fuerit illorum animantium familia.

Subsequentæ,
præter pelliceas, byssinae
ac lineæ vestes, eæque
vel ordinariæ, vel festivæ, vel lugubres.

§. XXVI. Sæculis ante & post diluvium subsequentis, præter pelliceas, aliæ vestes, eæque molliores, siue byssinae siue ex aliis materiis paratae, in usu fuerunt. אֲרֶרֶת שֵׂעָר, seu *toga villosa*, quali postmodum prophetæ, siue veri, siue falsi nominis, vsi sunt 2 Reg. I, 8. Zach. XIII, 4. Matth. III, 4. & Hebr. XI, 37. in historia natiuitatis Esau commemoratur Gen. XXV, 25. byssina vero vestes, in historia Iosephi c. XLI, 42. Byssus autem, Hebræis שֵׁשׁ vel בֹּץ dicta, genus præstantissimi lini Aegyptiaci

aci fuit, coll. Ex. XXXIX, 28. & Ez. XXVII, 7. At *lineæ* quidem vestes his, qui calidius clima colunt, æstiuo tempore commodissimæ; quia, si quid immunditiei ex crebriore sudore contraxerunt, aquis lauari, & ablutæ in locum immundarum commode surrogari possunt: id quod vocatur **החליף שמלות** *permutare vestes*, & sacra adituris maxime solemne erat, coll. Gen. XXXV, 2. Sunt autem vestes omnes vel ordinariæ & quotidianæ, vel festiuæ, vel lugubres. Hæ in luctu ac pœnitentia locum habuerunt; ut quum Iosephus, audito nuncio, quasi Iosephus a feris discerptus esset, *vestibus suis ordinariis laceratis, saccum posuit in lumbis suis*, c. XXXVII, 34. vbi caue, per *saccum* intelligas receptaculum ex crassiore lino factum condendo frumento, vt c. XLII, 28. potius est genus vestis lugubris, angusta forma, ex hircorum seu caprorum pilis contextum, colore nigrum, Latinis *cilicium* dictum, coll. Esth. IV, 1. 2. 3. **σάκκος τεύχιμος** Apoc. VI, 12. Illæ vero, videlicet *festiuæ* vestes, tales sunt vel pretio, vt *vestes Esau* **החמרות** *pretiosiores*, quas mater domi seruabat c. XXVII, 15. vel *munditie*, i. e. lotæ candidæque, vt, quum Iacobus, Bethalem ad sacra facienda profecturus, familiæ suæ, *Mundate vos*, inquit, & *permutate vestes vestras*, Gen. XXXV, 2. dictæ tum hæ tum illæ **חליפות שמלות** *permutationes vestium*, seu *vestes mutatoriae*, quibus habitus permutari possit, *Luthero Feyer-Kleider*, non ab *igne Feuer*, vt perperam nonnulli intelligunt, sed a *feris*, hoc est, *festiuæ*, Gen. XLV, 22. De ordinariis nihil est amplius, quod moneamus.

§. XXVII. Obseruamus porro, vestes pro diuersitate sexuum fuisse vel viriles vel femininas. Nec enim est dubium, quin patriarchali iam tempore obtinuerit, quod postmodum Mosaica lege populo Israelitico inprimis sancitum est Deut. XXII, 5. *Ne sit vas (vestis) viri super mulierem, & ne induat vir vestem mulieris; quoniam abominabilis Domino Deo tuo est quisquis hæc facit.* Quædam tamen vestimentorum genera, quibus & ornamenta pretiosiora, ex auro, argento & gemmis facta, accensemus, vtrique sexui fuerunt communia: vt **הנזמים** *monilia*, Vestes vel viriles, vel femininæ, vel vtrique sexui communes. In his monilia, in istis annulus & fascia.

monilia, seu *circuli aurei*, qui ornatus primo vel nasi vel aurium, deinde vel feminarum vel marium fuit. Nam Gen. XXIV, 22. de seruo Abrahami dicitur: *Sumsit vir ille* (nempe, quod subauditur, ut muneris loco offerret futuræ Isaac sponſæ) **נִזְמָה** *monile aureum*, cuius pondus esset *Beka*, hoc est, dimidium sicli, coll. Ex. XXXVIII, 26. Vbi caue, cum LXX Interpretibus **ἐνώτια**, seu cum Latino interprete *inaures* intelligas, significatu saltem proprio: quia sic regulariter dicendum fuisset, non **נִזְמָה** *monile* in Singulari, sed **נִזְמֵי** *monilia*, vel **שְׁתֵּי נִזְמֵי** *duo monilia*. Potius l. c. intelligitur *circulus aureus nasi*, hoc est, naso impendens, vel per nares transfixus. Dicit enim servus v. 47. **וַאֲשֶׁם הִנֵּס עַל אָפֶה** *posui monile illud super nasum eius*. Conf. Ezech. XVI, 12. & **נִזְמֵי הָאָף** *monilia nasi* Esa. III, 21. Recteque ABR. B. EZRA Comm. ad Gen. XXIV, 22. *Est, inquit, duplex נִזְמָה seu monile, vnum in naso, alterum in aуре: monile, quod naso imminet, desuper descendit, filo in fronte alligatum*. Qui muliebris ornatus cum nostris hominibus non adeo notus, ac paradoxus nostris moribus sit; igitur, ad intelligentiam sacri textus, nobis edisserendus est. B. HIERONYMVS Comm. ad Ezech. IV. *Verbum, inquit, Hebraicum נִזְמָה, excepto Symmacho, qui interpretatus est ἐπὶ ῥῖνιον, omnes inaurem transtulerunt: non quo inaures ponantur in naribus, quæ ex eo, quod de auribus pendeant, inaures vocantur: sed quo circulus in similitudinem factus inaurium, eodem vocabulo nuncupetur: & vsque hodie, inter cætera ornamenta mulierum, solent aurei circuli in os ex fronte pendere, & imminere naribus*. Quod vero huiusmodi monile etiam naribus ipsis insertum Orientales feminae gestent aliquando, de eo vide sis, CL. WALTHERI, Missionarii Danici, epistolam ad Præsidentem Tranquebaria datam in der XXIVten Continuation des Berichts aus Ost-Indien p. 1009. Hactenus de monilibus narium muliebribus. Idem contra vocabulum notat *ornatum aurium*, ipsis consuetum maribus, Gen. XXXV, 4. *Tradiderunt familia Iacobi, & quicunque ad eum pertinebant, omnes de astros peregrinos, quos tenebant, וְאֵת הַנִּזְמֵי & monilia, quæ erant in auribus eorum: & defodit eos Iacobus sub ilice, quæ est infra Sichemum*. Quo loco

loco tamen non vulgaria intelliguntur monilia, hoc est, ad merum ornatum spectantia, ac adeo indifferentia, sed sacra, seu potius superstitiosa, amuleti instar, ad malum quodpiam auerruncandum, gestata: de quibus vid. CLE. RICVS Comm. ad l. c. Vnde euenit forte, vt ab hac annulorum seu monilium specie monilia in vniuersum Chaldæis & Syris קרשים, quasi consecrata, fuerint dicta, per synecdochen. Ratio, cur superstitiosa intelligi debeant monilia, est gemina: primo, quia coordinantur deastris peregrinis; deinde, quia, tanquam superstitionis instrumenta, vna cum deastris ab Iacobo sub ilice defossa sunt. Porro in virili ornatu fuerunt quoque חותם annulus sigillatorius, & פתילים filamenta, quæ Thamara, meretricem mentiens, ab socero suo Iuda, vna cum baculo, pignoris loco exegit, Gen. XXXVIII, 18. vbi Clericus scite confert Herodotum lib. I. c. 195. obseruantem, sic instructos processisse Babylonios: Singuli sigillum & sceptrum habent. Per פתילים autem, seu filamenta, fasciam e contortis filis, qua cinctus fuit Iudas, commodissime forte intellexeris.

§. XXVIII. Vt autem de muliebribus vestibus aliqua adiiciamus, sin. Muliebris gulare hoc fuit veteris Orientis institutum, quod mulieres pro diuerso statu, vestitus viri prout vel virgines, vel coniugatæ, vel viduæ essent, habitu aliæ ab aliis distinguuntur, vxo- rinum, vidua- rum, item- que piarum ac impiarum diuersus. Nam licet mulieres velari alias quoque consueuerint, sicut legimus Rebecam conspecto sponso Isaaco, se obtexisse sumto צעיף rum, item- velo, Gen. XXIV, 65. itemque Thamaram, c. XXXVIII, 14. tamen coniu- que piarum gatas mulieres singulari modo velatas fuisse, velari saltem debuisse, ex Saræ ac impiarum historia colligimus: quam cum Abimelech pro virgine habitam ducere diuersus. voluisset, redditam diuino monitu Abrahamo donat mille argenteis, aiens: Ecce illud argentum esto tibi velamen oculorum coram omnibus, qui apud te sunt; nempe vt maritatam te esse intelligant, nec pari modo ac ego tua causa periculum subeant. Et Thamara extra illum casum, quo soceri concubitum meretricio gestu suffuratura erat, amicta fuisse legitur בגדי אלמנותה vestibus viduitatis suæ, seu vidualibus, c. XXXVIII, 14. 19. Porro licet in piarum mulierum patriarchalium vestitu non defuerit aureus atque argenteus ornatus monilium armillarumque c. XXIV, 22. & vestium pretiosarum v. 53. in primis, vbi solemnitas eum videbatur exposcere; tamen ad modestiam morumque castitatem fuit compositus, vti nos docet Apostolus 1 Tim. II, 9. 10. 1 Petr. III, 3. 4. 5. Cainitarum contra mulierum habitus (si Pseudo-Ionathani in Paraphrasi ad Gen. VI, 2. credimus) ad luxum & libidinem totus comparatus fuit. Ita enim ille l. c. habet: Viderunt filii optimatum filias hominum, quod pulchræ essent, & fucantes faciem, & discernentes capillos, & ambulantes cum manifestatione carnis & cogitatione scortationis.

§. XXIX. Ceterum, vt Patriarcharum ἀνταγνεια, in amictu non minus quam victu, laudem meretur, & exemplo nobis esse debet, vt contenti simus, si necessaria nobis suppetant vitæ instrumenta, exemplo pii Iacobi, qui in Mesopotamiam proficiscens, nihil ultra sibi a Deo vovebat, quam panem

ad comedendum, & vestem ad induendum, Gen. XXVIII, 20. ita tamen existimandum non est, quasi patriarchæ in vestium siue materia, siue forma & accidentibus aliis, pervicaces & ἰδιογνώμονες fuissent; ita vt v.g. pellibus tantum, exemplo Adami & Euxæ, non item lineis laneisque vestibus; aut atro tantum fuscoue, nec aliis coloribus; aut eo tantum modulo typoque vestium, quem Deus ipse primis parentibus aptauerat, nec aliis formulis, vti voluissent; aut, quod maius est, hanc diuersitatem timori Numinis aduersari statuissent. Immo vidimus Rebeccæ ab Abrahami seruo data esse aurea monilia cum armillis, Esauum item, præter quotidianas vestes, habuisse *החמרות* pretiosas atque festiuas, quas mater pia domi suæ ipsa ei seruauit c. XXVII, 15. Sed & pius ille Iosephus, dum adhuc domi esset, gestauit *כתנת פסים*, χιτῶνα ποικίλον, tunicam versicolore[m] atque Attalicam, c. XXXVII, 3. habitum, qui postea regionum liberorum fuit 2 Sam. XIII, 18. Idemque cum diuina prouidentia in excelso dignitatis fastigio collocatus esset, byssinis se vestibus indui, aureaque torque collum ornari passus est, Gen. XLI, 42. Hoc vno igitur ab impiis hominibus diuortium fecerunt, quod modestiam tuiti sunt contra sæculi sui leuitatem, luxuriam & vanitatem.

NOBILISSIMO CANDIDATO
S. D. PRAESES.

ABsoluisti nunc bono cum Deo antiquitates œconomiæ patriarchalis, quas geminæ disputationis, sub meo habendæ præsidio materiam esse voluisti: argumentum, quod studiis Tuis quum maxime conueniret, quodque non minus iucundum, quam vtile, & tum ad totius Geneseos Mosaicæ, tum ad patriarchalium imprimis rerum intelligentiam esset necessarium; dignum proinde, in quo non Tua solum se exerceret industria, sed & lectores quilibet, quibus sacræ litteræ curæ cordique sunt, studium & attentionem suam defigerent: imprimis, cum velut in speculo pulcherrimum nobis res præsentet exemplar rei familiaris, in fide atque timore Numinis prudenter feliciterque administrandæ. Quodsi in posterum, ac per omnem vitam, ad hoc patriarchale speculum oculos mentemque conuerteris, & patriarcharum animo Tuum penitus conformare studueris, equidem non dubito, quin eius rei fructum amplissimum habiturus, Deoque gratus, ecclesiæ vero, cuius vsibus ac ministerio Te consecrauisti, utilis sis futurus. Quod reliquum est, gratulor Tibi honores Philosophicos, quos, ab amplissimo Philosophorum ordine iam Tibi decretos, præmium diligentiae Tux, abhinc proxime accipies: eosque Tibi salutares & quam auspiciatissimos esse cupio. Vale, Dabam d. xii. Iul. c1819cc xxix.